



Broj/ Број : 03/4 – 50 – 1-10 – 2-8/07
Sarajevo/ Сарајево : 17.4.2007.godine

Z A P I S N I K

2. sjednice Zajedničke komisije za evropske integracije Parlamentarne skupštine BiH, održane 16. 4. 2007.

Drugu sjednicu Zajedničke komisije za evropske integracije Parlamentarne skupštine BiH sazvaо je njen predsjedavajući Halid Genjac.

Sjednici su prisustvovali članovi Zajedničke komisije: Halid Genjac, Drago Ljubičić, Alma Čolo, Branko Dokić, Zoran Koprivica, Šemsudin Mehmedović, Hilmo Neimarlija i Rudo Vidović, kao i Nevenka Savić, sekretar Komisije, i Sabina Pstrocki, pripravnik-volonter. Ivo Miro Jović, Selim Bešliagić, Azra Hadžiahmetović i Milica Marković opravdano su odsustvovali.

Sjednici su prisustvovali i: Osman Topčagić, direktor Direkcije za evropske integracije BiH sa saradnicima Dženanom Hodžić i Draganom Mrkaljem; Samir Ćorović iz Ureda predsjedavajućeg Vijeća ministara BiH; članovi Misije OSCE-a u BiH – Program podrške Parlamentu: Ulrich Steinle, Steve Lee i Nataša Šakota.

Sjednicom je predsjedavaо predsjedavajući Zajedničke komisije Halid Genjac. Nakon što je konstatirao da postoji kvorum, predsjedavajući Komisije predložio je dnevni red kako je naveden u pozivu za sjednicu. Zoran Koprivica predložio je da se dnevni red dopuni informacijom o Konferenciji održanoj povodom obilježavanja 50. godišnjice Rimskih ugovora. Prijedlog je jednoglasno usvojen, a informacija će biti prezentirana pod tačkom Razno. Predsjedavajući je, zatim, predložio dopunjeni dnevni red, kako slijedi:

D O P U N J E N I D N E V N I R E D

1. Usvajanje Zapisnika Konstituirajuće sjednice;
2. Prijedlog plana rada za 2007.;
3. Prijedlozi i sugestije Zajedničke komisije za plan rada Doma naroda i Predstavničkog doma PSBiH u 2007.;
4. Priprema seminara za članove Komisije o iskustvima drugih zemalja u procesu pridruživanja EU (uz podršku misije OSCE-a u BiH);
5. Tekuća pitanja;

- organizacija posjete Komisiji za evropske integracije Parlamenta Republike Češke,
- informacija o Konferenciji “50 godina Rimskih ugovora i budućnost zapadnog Balkana”.

Dopunjeni dnevni red usvojen je jednoglasno.

Ad. 1. Usvajanje Zapisnika Konstituirajuće sjednice

Zapisnik Konstituirajuće sjednice usvojen je jednoglasno.

Ad. 2. Prijedlog plana rada za 2007.

O Prijedlogu plana rada u uvodnom izlaganju govorio je predsjedavajući Komisije. Podsjetio je prisutne da je u Izvještaju o napretku za 2006. godinu, koji je izdala Evropska komisija, Zajednička komisija za evropske integracije u prethodnom mandatu ocijenjena kao neaktivna, te da njen rad u tom periodu nije bio zadovoljavajući. U tom smislu, pred novim sazivom Parlamentarne skupštine BiH i ove komisije je težak i odgovoran zadatak da takvu ocjenu promijeni, da se nametne kao proaktivan partner domaćim institucijama i međunarodnoj zajednici u svim pitanjima koja se tiču nadležnosti Komisije. Posebna pažnja bit će posvećena integracionim procesima, izvršenju budžeta u dijelu koji se odnosi na evropske integracije i međunarodnoj saradnji. Komisija će u svom radu koristiti javna saslušanja za pitanja od šireg interesa, po potrebi osnivati potkomisije i pozivati predstavnike domaćih i međunarodnih institucija kada njihovo mišljenje bude potrebno za donošenje odluka. Plan rada dat je po mjesecima, a Komisija će u narednom periodu pripremiti godišnji radni kalendar. U pripremi Plana rada korištene su i sugestije eksperata Misije OSCE-a koji prisustvuju sjednici Komisije.

U diskusiji o Planu rada Osman Topčagić istakao je da je pripremljen kvalitetan sadržaj rada. On se osvrnuo na rad Komisije u prethodnom mandatnom periodu i naglasio da je iniciran COSAP, proces koji se odnosi na saradnju parlamentarnih komisija koje se bave evropskim integracijama u regionu zapadnog Balkana. Topčagić predlaže da se ta činjenica iskoristi u narednom periodu. Kao prijedloge za plan rada, Topčagić je iznio sljedeće aktivnosti:

- praćenje implementacije Ugovora o uspostavi energetske zajednice;
- praćenje implementacije Ugovora o “otvorenom nebu”;
- praćenje implementacije CEFTA sporazuma;
- praćenje implementacije Sporazuma o viznim olakšicama i readmisiji između BiH i Evropske komisije.

Drago Ljubičić govorio je o značaju ove komisije u budućem procesu integriranja i potrebi uske saradnje s ekspertima Direkcije za evropske integracije BiH.

Na kraju diskusije, predsjedavajući je predložio da se glasa o Prijedlogu plana rada s iznesenim sugestijama. Članovi Komisije jednoglasno su usvojili Plan rada.

Ad. 3. Prijedlozi i sugestije Zajedničke komisije za plan rada Doma naroda i Predstavničkog doma PSBiH u 2007.

Predsjedavajući Komisije Halid Genjac prezentirao je prijedloge iz materijala koji je prethodno dostavljen članovima Komisije, a zatim otvorio diskusiju o ovom pitanju.

Osman Topčagić predložio je da se u materijal uključe i preostali prioriteta od šest ključnih prioriteta iz Evropskog partnerstva za BiH: saradnja s Tribunalom u Hagu, reforma policije, reforma javne uprave, mjere za jačanje jedinstvenog ekonomskog prostora i preostale obaveze iz reforme javnog RTV sistema.

Alma Čolo podržala je prijedlog o uključivanju saradnje s Tribunalom u Hagu, s tim da se za izvjestioca o ovom pitanju zaduži Vijeće ministara BiH, odnosno Ministarstvo pravde BiH, a ne entitetski organi.

Članovi Komisije su, zatim, jednoglasno usvojili predloženi tekst s iznesenim dopunama.

Ad. 4. Priprema seminara za članove Komisije o iskustvima drugih zemalja u procesu pridruživanja EU (uz podršku Misije OSCE-a u BiH)

Predsjedavajući Komisije informirao je prisutne da je Misija OSCE-a u BiH spremna finansirati i organizirati seminar o iskustvima Slovačke u procesu priključenja Evropskoj uniji. Cilj seminara bio bi da se članovi Komisije upute u najbolje prakse u korištenju nadzora nad izvršnom vlasti u procesu integriranja, kao i u informiranju građana o evropskim pitanjima. Seminar bi trebalo da bude održan krajem maja ili početkom juna.

Osman Topčagić informirao je članove Komisije o spremnosti Direkcije da održi seminar za sve članove Parlamentarne skupštine BiH, a o mjestu i datumu održavanja dogovor će biti postignut naknadno. Halid Genjac predložio je da se, u nastavku održavanja seminara o iskustvima Slovačke u procesu integriranja, organizira i prezentacija eksperata Direkcije za članove Komisije.

Ad. 5. Tekuća pitanja

a) organizacija posjete Komisiji za evropske integracije Parlamenta Republike Češke

Informaciju o ovoj tački dao je Samir Čorović koji je u prethodnom sazivu pripremao posjetu. On je informirao prisutne da je to trebalo da bude uzvratna posjeta češkim parlamentarcima, da je bila dogovorena i pripremljena, ali nije realizirana zbog obaveza članova Komisije. Dogovoreno je da se diplomatskim putem ponovo pokrene inicijativa da se posjeta realizira. Branko Dokić predložio je da se program posjete kvalitetno pripremi.

Samir Čorović informirao je članove Komisije da se već dvije godine dogovara posjeta Parlamentu Danske, te da bi se u narednom periodu i ova posjeta mogla realizirati.

b) informacija o Konferenciji “50 godina Rimskih ugovora i budućnost zapadnog Balkana”

Osman Topčagić, koji je bio i jedan od uvodničara na Konferenciji, govorio je o njenom značaju i informirao članove Komisije da će Direkcija za evropske integracije BiH pripremiti materijal koji će sadržavati i zaključke Konferencije.

Predsjedavajući Komisije
Halid Genjac